



「大智度論」集粹之五十九

# 菩薩應學成佛樹 饒益衆生

## 智 銘

須菩提白佛言：「世尊！是般若波羅蜜甚深，諸菩薩摩訶薩不得衆生，而爲衆生求阿耨多羅三藐三菩提，是爲甚難。譬如人欲於虛空中種樹，是爲甚難。菩薩摩訶薩亦如是，爲衆生故，求阿耨多羅三藐三菩提，衆生亦不可得。」

佛告須菩提：「如是，如是！諸菩薩摩訶薩所爲甚難，爲衆生故，求阿耨多羅三藐三菩提，度著吾我顛倒衆生。譬如人種樹，不識樹根，莖、枝、葉、華、果而愛護灌溉，漸漸長大，華、葉、果實成就，皆得用之。如是，諸菩薩摩訶薩爲衆生故，求阿耨多羅三藐三菩提，漸漸行六波羅蜜，得一切種智，成佛樹，以葉、華、果實益衆生。」

何等爲葉益衆生？因菩薩摩訶薩得離三惡道，是爲葉益衆生。何等爲華益衆生？因菩薩得生刹利大姓、婆羅門大姓、居士大衆，四天王天處，乃至非有想非無想處，是爲華益衆生。何等爲果益衆生？是菩薩得一切種智，令衆生得食陀洹果、斯陀含果、阿那含果、阿羅漢果、辟支佛道、佛道，是衆生漸漸以三乘法，於無餘涅槃而般涅槃，是爲果益衆生。

是菩薩摩訶薩，不得衆生實法，而度衆生令離我顛倒著，作是念：「一切諸法中無衆生，我所爲衆生求一切種智，是衆生實不可得。」

須菩提白佛言：「世尊！當知是菩薩爲如佛。何以故？是菩薩因緣故，斷一切地獄種，一切畜生種，一切餓鬼種，斷一切諸難，斷一切貧窮下賤道，斷一切欲界、色界、無色界。」

佛言：「如是！如是！當知是菩薩摩訶薩如佛。若菩薩摩訶薩不發心求阿耨多羅三藐三菩提，世間則無過去、未來、現在諸佛，世間亦無辟支佛、阿羅漢、阿那含、斯陀含、須陀洹、三惡趣及三界。亦無斷時。當知是菩薩實如佛。何以故？以如故說如來，以如故說辟支佛、阿羅漢一切賢聖；以如故說爲色乃至識，以如故說一切法，乃至有爲性、無爲性。是諸如，如實無異，以是故說名爲如。諸菩薩摩訶薩學是如，得一切種智，得名如來。以是因緣故，說菩薩摩訶薩當知如佛，以如相故。」

菩薩摩訶薩應學如般若波羅蜜，菩薩學如般若波羅蜜，則能學一切法如，學一切法如，則得具足一切法如；具足一切法如已，於一切法如得自在。於一切法如得自在已，善知一切眾生根。善知一切眾生根已，知一切眾生根具足，亦知一切眾生業因緣，知一切眾生業因緣已，得願智具足，得願智具足已，淨三世慧。淨三世慧已，饒益一切眾生。饒益一切眾生已，淨佛國土，淨佛國土已，得一切種智，得一切種智已，轉法輪，轉法輪已，安立眾生於三乘，令入無餘涅槃。如是，菩薩摩訶薩欲得一切功德，自利利人，應發阿耨多羅三藐三菩提心。」

須菩提問：「世尊！初發意菩薩摩訶薩，為眾生故，求阿耨多羅三藐三菩提，得幾所福德？」

佛告須菩提：「……若三千大千世界中眾生，皆住乾慧地，其福不如初發意菩薩百倍、千倍、巨億萬倍，乃至算數譬喻所不能及。」

是初發意菩薩應念一切種智，所諸一切種智者無所有：無念、無生、無示、然一切種智何等緣？何等增上？何等行？何等相？一切種智無法緣，念為增上，寂滅為行，無相為相。是名一切種智緣、增上、行、相。

一切種智無法，色（受、想、行、識）亦無法，乃至有為相、無為相亦無法。蓋一切種智自性無故，若法自性無，是名無法。色乃至有為相、無為相亦如是。

諸法和合因緣生，法中無自性，若無自性，是名無法。以是故。菩薩摩訶薩當知一切無自性。何以故？一切法性空故，以是故當知一切無自性。

菩薩摩訶薩能學諸法無自性，亦能淨佛世界，成就眾生。知世界眾生亦無性，即是方便力。是菩薩摩訶薩行檀波羅蜜修學佛道，行尸羅波羅蜜修學佛道，行羼提波羅蜜修學佛道，行毗梨耶波羅蜜、禪波羅蜜，般若波羅蜜修學佛道，乃至行一切種智修學佛道，亦知佛道無性。是菩薩摩訶薩行六波羅蜜修學佛道，乃至未成就佛十力、四無所畏、四無礙智、十八不共法，大慈大悲，一切種智，是為修學佛道。

能具足是佛道因緣已，用一念相應慧，得一切種智。爾時，一切煩惱習永斷，以不生故。是時，以佛眼觀三千大千世界，無法尚不可得，何況有法？如是，菩薩摩訶薩，應行無性般若波羅蜜，是名菩薩摩訶薩方便力。

無法尚不可得，何況有法！是菩薩摩訶薩若布施時，布施無法尚不知，何況有法？受者及菩薩心，無法尚不知，何況有法！乃至一切種智，得者、得法、得處，無法尚不知，何況有法！何以故？一切法本性爾，非佛作，非聲聞、辟支佛作，亦非餘人作，一切法無作者故。

諸法、諸法性離，菩薩摩訶薩以世諦故，示眾生若有、若無，非以第一義諦。然世諦、第一義諦，無異也。何以故？世諦如如，即是第一義諦如。眾生不知、不見是如故，菩薩摩訶薩以世諦示，若有、若無。復次，眾生於五受眾中，有著相故，不知無所有，為是眾生故，示若有、若無，令知清淨無所有。如是，菩薩摩訶薩應當作是行般若波羅蜜。」

論曰。無所得即是得，是般若甚深，須菩提以樹為譬喻，葉、華、果實，從薄轉厚（言菩薩漸修而得成就）如樹葉蔭，熟時涼樂，眾生因菩薩道樹蔭，得離三惡道熱苦。何以故？遮惡故。如華色好香淨柔軟，眾生因菩薩以布施、持戒教化故，受人天中福樂。如樹果色香味力，眾生因菩薩故，得須陀洹等諸聖道果。因云菩薩如佛無異。

諸法如故，說名如來，以如故，說色乃至無為性，是諸法如，皆一無異。菩薩學是如，必當得薩婆若，是故言如佛無異。不我心貪貴菩薩故，說言如佛，以得如故言如佛、是如在佛，亦在菩薩，以一相故，是名菩薩為如佛。離如，更無有法不入如者。

因如故，名菩薩如佛。畜生亦有如，因緣未發故，不能利益眾生，不能行如至薩婆若故。如是，菩薩應學是如般若波羅蜜，菩薩學是如般若故，則能具足一切法如，具足名得諸法實相，能以種種門令眾生得解。以得具足故，於一切法如得自在，得是諸法如自在已，能善知眾生根故，能知眾生諸根具足。

諸根者，信等五善根，三乘人各各有，能分別是人，是人無，是人得力，是人不得力，具足者，信等善根具足，如是人能出世間。信根得力，則決定能受持不疑，精進力故，雖未見法，一心求道，不惜身命，不休不息，念力故，常憶師教，善法來聽入，惡法來不聽入，如守門人。定力故，攝心一處不動，以助智慧，智慧力故，能如實視諸法相。

得根有二種：一者、在大心人身中，則成菩薩根。二者、在小心人身中，則成小乘根。得是具足根，則可度。或有菩薩見人雖得信等五根而不可度，由先世惡業罪重故，是故言知一切衆生業因緣。

欲知無數劫業因緣，要得宿命通，既知已，爲衆生說過去罪業因緣。衆生以是過去罪，故不畏，是故求願智，欲知三世事，既知已，爲衆生說未來世罪業因緣，當墮地獄，衆生聞已，則懷恐怖，恐怖已，心伏易度。

衆生若欲知未來世福報因緣，爲說已則歡喜可度。是故說知業因緣已，願智具足。願智具足故，得三世慧淨，通達無礙，知過去善惡業，又知未來善惡果報，知現在衆生諸根利鈍，然後說法教化，多所利益不虛。

大利益衆生故，能淨佛國土，淨佛國土已，得一切種智，得一切種智故，轉法輪，轉法輪已，以三乘安立衆生，入無餘涅槃。如是利益，皆從學如中來，是故佛說菩薩欲得一切功德，自利利人，當發阿耨多羅三藐三菩提心。

甚深般若無憶想，非初學所得，初發心菩薩應念一切種智，一切種智者，即是阿耨多羅三藐三菩提；薩婆若，佛法、佛道，皆是一切種智異名，初發意菩薩，因未得深智慧，既捨世間五欲樂，佛教繫心念薩婆若，應作是念：雖捨小雜樂，當得清淨大樂捨顛倒虛誑樂，得實樂。捨繫縛樂，得解脫樂、捨獨善樂，得是一切衆生樂善。得如是等利益故，佛教初發意者，常念薩婆若。

一切種智無所有，無所有名非法，無生無滅。諸法如實緣亦無所有，念爲增上，寂滅如行，無相爲相。皆是畢竟空，然諸法

各各有力，佛智慧是畢竟空，如、法性、實際、無相、所謂寂滅相。佛得一切種智，不復思惟，無復難易遠近，所念皆得故，言念爲增上。

但一切種智無法，色等法亦無法，蓋法從因緣和合生，即無自性，若法無自性，即是空無法，以是因緣故，當知一切法無所有性。

於無所有法性中學，入觀亦能集諸功德，教化衆生，淨佛世界，即是方便力。所謂有無二法，能一時行故，所謂畢竟空，集諸功德。是人行六波羅蜜時，亦修治佛道。如佛心以畢竟空無所有法，行六波羅蜜，乃至一切種智。是菩薩行是道，能具足佛十力、四無所畏、四無礙智、十八不共法。大慈大悲。行菩薩道時，具足是法，坐道場，用一念相應慧，得一切種智。煩惱及習永盡，更不復生。

得佛已，以佛眼觀一切十方世界中，一切物當不見無，何況有法！畢竟空法能破顛倒，令菩薩成佛，是事當不可得，何況凡夫顛倒有法！是故，當知一切法無所有相，是名菩薩方便。空尚不可得，何冲有！故菩薩應行無所有般若波羅蜜。

菩薩行無所有般若波羅蜜，若布施時，即知布施物空，無所有，受者及菩薩心亦無所有。乃至一切種智，得者、得法、得處，無法尚不知，何況有法！得者，菩薩；得法，是阿耨多羅三藐三菩提，用得法是菩薩道，皆知是法無所有，何以故？一切法本性爾，不以智慧故異，非凡夫作，亦非諸聖人作，一切法無作，無作者故。

若諸法都是無所有相，誰知是無所有？菩薩爲世俗故，爲衆生說若有、若無，非第一義，若有是實有，無亦應有實；若無不實，無云何應實？然世俗如即是第一義如，衆生不知是如故，以世俗爲說若有、若無。

衆生於五受陰中有所著，爲是衆生離所有，得無所有故，菩薩說無所有，世俗法故分別諸法，欲令衆生知是無所有，是故，菩薩爲自利利人，應學無所有般若波羅蜜，以饒益衆生。